

Chuailo

Forthnightly Newsletter



Vol. No. X Issue No. 8

KOLKATA MIZO STUDENTS

30th Sept, 2013 (Sunday)

KOLKATA MIZO STUDENTS' SPORTS 2013

KMS Sport 2013 chu dt 27.09.13 atang khan neih tan a ni ta a, Basketball khelh zawh tawh niin Niar Niar te chu champion an ni. Naktuk ni 30.09.13 atang hian Football leh thil dangte khelh tan a ni ang.

Basketball hi dt.27.09.13 khan WBBA Court-ah khelh tan a ni a, game hmuhawm tak tak en tur a awm a, fans lam pawh an kal tha hle.

Semi Final khel turin Niar Niar, West Bengal, Xavier's leh Kolkata Thunder an inhlankai a. Semi final hmuhawm tak khelh a nih hnuah Xaviers leh Niar Niar te'n Final khelin Niar Niar hi an champion ta a ni.

Final match inhnehtawk leh hmuhawm takah hian Niar Niar lamin point 44 score-in Xaviers lamin point 43 an score ve bawk a ni. Champion team hian cheng 3000 an dawng ang a, runners up hian rs 2000 an dawng bawk ang.

SUNNA

Scottish Church College a lut thin Tv. Johnny L a l rem ru a t a Tuikual 'N' chu dt.21.09.13 khan tlawng lui ah chesualin a boral a, KMS te'n kan uin kan tuar takzet a ni.



Johny-a boral hian KMS-te min barakhaih hle a, kan member leh Kolkata-a lo awm tawh thin, Mizoram lama awm mekte pawh a theih ang ang a inkokhawmin Johny-a te in lamah leh a ruang zawna lamah an buai hle a ni.

Johny-a ruang hi he thu buatsaih lai thlang hian hmuh a la ni lo a, tunah hian zawn mek zel a la ni.

Football hi naktuk 30.09.13 hian GD Ground, Salt Lake-ah khelh tan a ni dawn a, hetiang hi match awm dan tur a ni ang;-

N.I.H Vs. Hi-Flight
Xaviers Vs. Asansol
Samuel & Fela's Club Vs. FCB
Duff Vs. SA Boys

Inkhel hmasa tur hi la siamrem a nih loh avagin a hmuna pawh chawp tur a ni dawn a, churang chuan Team tel turte chu a hun taka thlen kan tum theuh dawn nia. Hun tiama thlang hman theilo tura harsatna nei kan awm a nih chuan Sports Secretary hnenah a hmalam a hriattir tur a ni ang.

CHUAILO ANNUAL MAGAZINE

Chuailo annual magazine 2013-2014 ami tur Colege/Institution thlalak la thelut lote chuan a rang lamin **kmschuailo@gmail.com** ah emaw, KMS president hnenah emaw thehluh tur a ni.

Annual magazine ami tur article(English leh Mizo) a tam thei ang ber kan mamawh dawn a; member, helama tui leh ziak ve hrim hrim duhte chu ziah theuh tum turin kan inngen a ni. Article leh poem ziahtute tan pawh a chung a email kan tarlanah khian thehluh tur a ni ang.

A khawih tu turte'n an peih hma theihna'n leh tha taka siam a nih theihna'n thlalak leh article thehluh turte'n muangchang loa rawn thehluh thuai thuai turin kan inngen kan inhriattir a ni.

Tualchung...

Sports boruakin min chim mup mup a, kan tlangval lam chu an thu deuh thalh hlawm mai; Mahse an fit a ni! Hetia tisa lam insawizawina beia kan infiamna kan neih mup mup lai hian kohhran lam pawh kan hlimin beihruah kan hmang chho mek a, kan beihruah boruak a nuam thin hle. Tun tumah hian kan beihruah report tlangpui kan hriattheih chin lo tarlang leh ila:-

Dt.21.09.13 leh ni 22.09.13 beihruah programme te tluang taka hman leh a ni a, kan Thupui te a tha hlawmin, member ten kan tui pui hle.

Inrinni Inkhawm report:-

Ballygunge:

Inkhawm zat---70

Sharing zat---08

Chawhmeh neih zat--10

Salt lake:

Inkhawm zat----63

Sharing zat-----07

Chawhmeh neih zat--16

Pathianni- Biakin

Inkhawm zat-----122

Sharing zat-----07

Inkhawm banah Thingpui ruai kil ho a ni.

Thlarau lam chauh niloin tisa lamah pawh kan tlai thin hle. Beihruah la kal ve lo tan chuan kal ve ngei chi a ni e.

**THIHNA HI KAN NUNNA
KAILAWN A NISI...!**

CHUAILO

Estd. May, 2004

Editor : ahooma
 Joint Editors : VT.Lawmsanga
 : Lalruatkima
 : Vanlalpeki Ralte
 Patron : Alex Rosangluaia

**Enkawltu Kamliam****HRINGNUN HI**

Zingkar a lo ni a, kawmthlanga dawl hnahah chuan daifim a lo tling liau a, chu daifim tlinna dawl hnah chu thliin a chhem a, tui chu a luang kawi a luang kawi a. Ni a lo tlangsang a, dawl hnah chu a rawn en a, dawl hnah a tui tling pawh chu reilo teah tuihuah changin a lo ral thuai thin.

Ni e, kha dawl kha he kan hringnun zinkawng nen te hian ka tehkhin thin... kha dawl hnah a tui tling kha keini hi kan ni!

He khawvelah beiseinain kan lo piang a, beiseinain kan nung a, beiseina vekin kan boral thin. He hringnun hi tap chungin kan hmachhawn tan a, kawng chhuk chho zawhin kan khualzin kawng kan kal a, kan thaw a tawp rualin kan tum ram chu thlang turin hringnun khawvel kan chhuahsan thin.

Mi thenkhat chuan an hringnun hi an duh dan ang diak diaka herpui turin he khawvel hi an beisei thin a. He khawvelah hian mihring tam tak an awm ve tih lam reng an ngaihtuah lo, anmahni duhdan ang zel a her pui zel turin an beisei tlat a, an beisei loh anga thil a lo inherchhuah hunah chuan lungngaihna chhumina a rawn hliah thuai a, chu chhum chhah tak chu su tlang thei lovin an nunnain te a tawrh phah hial thin a ni.

Mi thenkhat chuan he hringnun hi sum leh pai emaw incheina emawin tih ropui an tum thin a. Mite aia a bik nih tumin an tlan a, sum ringawt ngaihtuahin an awm a, an duhtawk hmam thlan khurin a lem pil a, an hming a chuai nghal mai thin. A thenin incheina chhuak thar apiang an inbel theih chuan ropui berah an inngai thin a, a tawpah chuan engmah lo mai nen thlanah an liam thin. He hringnun ropuina hi chu kan dam laia kan thiltih that leh that loh ang zela ropui leh ropuilo mai a lo ni zawk!

Ni e, he hringnun hi chu zing lamah mawi takin a lo chhuak a, chhun lamah nisain min em a, tlai lamah chuan uaiin kan lo chul leh mai thin! Chhun lam a mi hmuh tura mawi taka kan par chuan kan uai hnuah pawh sawi kan la hlauh hre reng a, kumkhua hming daih tawh ngailohna chu kan hnutchhiah thin a ni. -RK

MITDELIN M.A PASS

Tv.K.Lalhminganga, Moriah Blind Hostel Luangmuala awm mek chuan Mizoram University atangin M.A(Public Administration) Second Division-ah a pass, Sanga hi naupang kum nga mi a nih lai atanga mitdel a ni a, 2005 khan HSLC chu second division-ah a pass a, 2007 khan HSSLC pass lehin 2010 khan Hrangbana college atangin B.A a pass chhuak baw k a ni.

NATIONAL SCIENCE SEMINAR-AH MIZO

Lalnunfeli, Baptist Higher Secondary Scool chu National Science Seminar dt.09.10.13 a Mumbai-a neih turah Mizoram aiawhin a tel dawn. Lalnunfeli hi September thlaa SCERT-in State Level Science Seminar an buatsaihah khan Lunglei District aiawha telin pakhatna a ni.

RUIHHLO MAN HNEM

Central YMA hnuai ruihhlo do pawl CADS chuan an indin tirh dt.29.05.10 atanga kumin August thla tawp thlang khan ruihhlo chi hrang hrang cheng 10,10,72,255 man hu an man tawh a ni. Ruihhlo kaihnhawih chungchanga an mi man 1028 chu police/Exice kutah an hlan a, mi 581 chu home-ah dah niin, mi 6161 chu counselling pek an ni.

MIZO PAIN NATIONAL AWARD DAWNG

Pu Khamliana, Mizoram Youth Club Founder President chuan India President kut atangin dt.20.09.13khan National Communal Harmony Awards for 2011 a dawng. Pu Khamliana hian Mizorama Drugs ngawl veite leh AIDS veite tanpuina leh chhawmdawlina hna a thawhthat avang te, India khua leh tuite tana inunauna leh inpumkhatna tha a awm theihna'n a a thawh that avangin he award hi a dawng a ni.

PISA KAI HUN TIDANGLAM

Mizoram sawrkar GAD thuchhuah angin dt.01.10.13 atang hian Mizoram House N.Delhi, Kolkata,Mumbai leh Bangalore chu zing dar 10 atanga tlailam dar 5 thlang office kai hun a ni ang a, Mizoram House Guwahati, shillong leh Silchar chu zing dar 9:30 atanga tlai dar 4 thlang office kai hun a ni baw k ang. He pisa kai hun hi dt .14.02.14 thlang hman a ni ang.

TUIVAI KHUAH REMTI LO

HPC chuan thuchhuah siamin an demand area chhunga Tuivai Hydro Project sawrkar-in siam a tum chu helai vela cheng mipuite tana him lo nia ngaiin siam an remtih loh thu an sawi.

article

NAKINAH CHUAN

-Lalruatkima

Hun hian kum tam a herliam pui ang a, tun hun hi hmanlai a chang tawh ang. Chu hunah chuan nuntharin bul kan tan ang a, tuna kan nunphung tam tak hi kan la hnualsuat ngei ang...

Nakinah chuan kan khawsak phung a danglam anga, thawrimna hlutzia leh a rah duhawm zia kan la hria anga. Thawk lova neih teuh teuh duhna rilru a bo anga, chutiang rilru pute chuan nuizhat an la hlauh ang.

Chu ni lo thlen hunah chuan Eiru hausa an inkiltawih anga, mahni thawhchhuah mila khawsa te'n eiru hausa kan la nuizhat ang. Chumi hunah chuan eiruk that lohzia inzirtir ngai lovin eiru kan hmuhsitnain kan rilru a hneh tawh ang.

Nakinah chuan ram hmangaihna tak tak thinlung neitute'n ram an hruai tawh anga, chung mite ram hruaina hnuaiah chuan ramin rahbi thar tukin hmasawna chu a zuanin kan zuan tir tawh ang. Sum hmanga ram hmasawna kan siamtheih hunah chuan ram hmasawna hmanga sum siam a awm tawh dawn loh avangin kan ram chuan raltiang ram thlir tawh lovin ramdangin raltiang ram thlirin minrawn thlir tawh ang.

Nakinah chuan tangka bawihah kan tanna ata hi kan la chhuak anga, tangka chu kan bawihah a tang tawh ang. Sum chu ropuina tehna hmanruaah kan hmang thei tawh lovang. Sum bawihah tang te tan zalenna dar a inkhawn rik hunah chuan Thluaka sum lut natna chu umbo a ni tawh ang.

Nakinah chuan kan pawnlam lan dan aiin chhunglam nun kan inthlir sak tawh ang. Chumi hunah chuan pawnlama sawr tham fe khawpa thuan inbel leh bawhlhlo eng ilo vel hmanga lan mawi tumna rilru chu ban sanin, chhunglam nundan hmangin kan pawnlam kan chei tawh ang. Kan incheina chi hrang hrangte leh kan thawhlawm hmangte hian Kohhran leh khawtlangah min dah filawr tawh lovanga, kan rilru zawk chu min lansarh tirtu a ni tawh ang.

Nakinah chuan " Kan Party Candidate chu vawkpui pawh nise ka vote thovang.." ti tute rilru hi a inthlak anga. Ram hruaitu atan chuan Party mi ni lovin Ram Hmangaihtu kan thlang tling tawh ang. Party bela chhum hmin tawh avanga Party ruihchilh te hi kan suan daih hunah chuan Jeroboama Policy, tlak hlauh vanga thudiklo pawh sawi mai thin ang hi ni tawh lovin Davida Policy hmangin ram hruaitute'n ram an hruai tawh anga. Tlak hlauh avanga mipui tlawn leh mi tihlungngawiloh hlauhavanga thil tha pawh tih theihlohna kutphuar hi phelh a ni tawh ang.

Nakinah chuan a thlawna pawisa sem leh dawn chakna rilru a bo tawhanga; Dawn chak avanga pute tlawn a bo tawh ang. Thleng ken dikloh avanga pawisa dawn theihloh thu min hrilh pawhin kan phun tawh lovang.

Nakinah chuan hlimna hi a zawn in kan zawng tawh lovang a, thiltha kan tih atangin hlimna chu kan hmu tawh ang. Hlimna kan umna lamah lungngaihna chirhdupah kan tla lut a, beidawna ruam zawhin mangang leh lungngaiin kan awm thin a. A tawpah chuan dam thlahlel tawh lo hial khawpin hlimna kan zawn na lamah kan awm thin. Chu a zawn a zawn hmuh theihloh hlimna chu zawn hmuh chi ni lova thiltha tihna atanga lo awm a ni tih kan hriat chinah chuan thiltha kan zawng anga, chu thiltha kan tihna chuan kan nunah leh ram tan thil ropui leh chhinchhiahtlakah min siam tawh dawn a ni.

Nakinah chuan dan hian mitin chungah ang khat veka len hun a la nei ngei ang. Chutih hunah chuan mirethei funte hnih khat man sak vanga lung ina luh a awlsam ang chiah hian eiru hausa tan sum vangin tan ina luh a awl ve tawh anga. Engemaw hleka hriselloh mai theihna natna hi a reh tawh ang. Chutih hunah chuan dan siamtu leh milian tan sum hmanga dan palzam theih a ni tawh lovang.

Nakinah chuan he kan khualzin kawng hi thui tak kan zawh tawh ang a. Kan tha chakna te chuan chuailam a pan anga, kan vun te a lo vuai tawh ang. Khawvel changkannain min kalpel tawh anga, tunlaia changkanna emaw kan tih hi nakinah chuan thil thing a ni tawh ang. Chutih hunah chuan he khawvel nen hian kan inhne rem thei tawh lo anga.. kan ngaihtuahna leh kan rilru sukthlek chu khawvel tan chuan thil hlui a ni tawh ang. Chutih hunah chuan tunlaia kan thiltih, kan chindan tha lo te hi kan tu leh fate chuan an la sim ngei ang!

JOHNY.....

JOHNY, Ka lehkhahu 'The Lost horizon' tih i hawh tum a tar theih loh na, damreina leh HUN awm tawh lohna hmun a awm ve i chak thu i sawi te kha ka hrechhuak a, kan P.G riang tea SUDDEN-a phawi ranzia kan sawi dun lai te khan hetiang hun hi i thleng ang tih reng ka ring pha lo. Kolkata ka chhuahsan dawn tum a Duff hostel atanga ka bag lian tak ka ah phei tir lai che kha ka mitthla ah ala cham reng nia. Hmani-a in Ina kan va kal te chu i nu hian alo au lawm lawm che a, lo haw thuai thuai turin a au che a sin; mahse tun hun thlengin ilarawn haw thei si lo. I nu mangang tap rawl te kha hre pha ve la chuan i va khawngaih dawn tehlu em! Tunah zawng i awm chakna hmun, tar theih tawh lohna hmunah i awm tawh ngei anga, Vantirhkoh te nena in zai ho bik turte hi ka thik rum rum che. Lei leh Van Lalber i hmuh hunah chuan i Nu leh Pa, i chhungte awmpuia thlamuan turinrawn dil ang che. Nangmah ngaiin mangang takin hun an hmang mek a nia....!

-Duhawma Chhangte

SPORTS TITI

Keini Kestopur Mizo FC te chuan kum dang ang lo takin kumin hian Salt Lake lama kan player tha te nen Salt Lake Area tih hming puin kanrawn khel dawn a. Nikum lamah KMFC ringawta kanrawn chhuah pawn semi-final thleng thei khawp a team tha kan ni a, kumin chuan final chu sawi loh, khuanun zah a ngai ang a, champion chu sure loh paw'n ngei ngei a ni tawp mai a ni. Kan team director lam te pawn tan an lansa a, tunah hian kan scout te Aizawl lamah tir chhoin, rei tak KMFC tana lo khel thin tuna Dinthar FC tana khel ta Dampuaia Toehhong pawh Dinthar FC-a a contract sign na man aia a leh hnih a tam contract an han sih hmuh a, kan scout te hnen atanga thu kan dawn danin flight cancel a awm te a nih loh chuan a hmel kan hmu leh thuai dawn e.

Rei tak KMFC captain lo ni tawh Sangzela (captain phunchiar) pawh tuh lai chu naute awm bak thawh a nei rih lo niin kan lo hre lehzela, a ni hi chu free transfer-in kan lak loh ngei a beisei awm a ni.

Sponsorship pawh arawn lut mawlh mawlh reng a, Mizoram lam leh khawvel hmun tin atangin arawn lut reng a, California atanga Maubawk lam atang te, New York atanga New Saiha thlengin sponsor tu kan hmu zut zut reng a ni.

Kan inkhelh hunah lah kan in nghahna ber kan fans te an ni leh dawn a, fans hi kan ngah khawp a, paper fan, table fan leh celing fan thlengin kan nei a, an ni tel lo hi chuan kan team hi 'khuang lova chai' ang lek kan ni dawn a ni. - **Loma Intoate**

Kan team-ah chuan chhuan ve deuh mai pakhat kan nei a, a khel that chuan kan hlauhawm ve viau ang. Kei pawh hi ka inhliam loh chuan ka tawrhlelhawm ve teu teu ngawt ang

- **Samuel LH Dika**

S.A Boys lam pawh kan phur tawh khawp mai, kan jersey neih thar zanah phei chuan ballboot nen kan mu vek, kan champion loh chuan kan protest ang.

- **Pet goal tuma**

Basketball-ah min lo hneh vel a, Football-ah chuan kanrawn vul chuk dawn, shaaala. Asansol makpa Zonuna Kawlni leh Piana Sailo te kan nei a, kan zam lo...

- **Samuel L.Fanai**

Mawi deuha chak loh ai chuan mawi vak lo pawhin chak tum mai tur- **Keimah Thingtlangpa**

^---He thu hi zawm loh theuh kan tum dawn nia.

- **PC.Puia**

Fellowship lai hian Zuliaa hmel hi va en ula, a lo nuih mek loh pawhin a nui zo chiah vel hmel a lo ni hrim hrim ang.

- **Alex the President**

Asansol-ah khan ka khel chak a sin lee....

- **Zonuna colney**

First Lady atan ka tling tawh... If you know what i mean...

- **Serena**

Ka phit deuh ber..

- **Dr.Op-a**

Basketball te chu thum famkimnen thiam hmel zetin court sir velah tei deuh chhen ila a ni mai a lawm....

- **Chhana(chhan seka)**

Pianpui Photographer tiin ka inchhal ngam ve tlat.

- **Arinsanga**

Mi basketball khel hi chuan an lo bei nasa, hngang tah pah mai mai chuan an lo khello tawp mai.

- **Xualtea Boytlung**

Mi restaurant chawl chuan thil ei zawh ah tips an pe a, U Samu-a chuan loh ve leh a'n pe vel ah..

- **Hmingthup :)**

Duh aiin chicks an kal tlem...

- **Jona(Zai mi)**

Zuliaa hi Ulhbunah a lang ngun bik hle, tun tumah pawh hian hmun hrang hrang atangin amah kahna tur arawn lut a, kan chhuah seng lo :P

- **Ed Board**

Samsei lamin min buaipui chuan damlo pawh kan dam nghal sawng sawng mai a lawm.

- **Hmingthana S.A**

I'm fine, free, feel better....

- **Temami**

Zaipawl kan zai lai hian Conductor en tur a ni tih ka lo hre lo reng reng..

- **Afaki Chongthu**

4ft hnuai lamah pawh hian nuam a lo tih ve theih khawp mai.

- **Tete mali, S.A girls**

Tun kum chu inla reh viau tawh teh ang

- **ApuiiKhangte**

Ka rin ai daihin thahrui ka lo nei...

- **Mimi Mizoram House**

Ka MNF ve nang a....!(A inpek duh chhan kan hre bik lo e.. Amah zawt mai ru..)

- **Larry S.A**